



~~C8289~~ Uc 4152

Bayerische Staatsbibliothek

München 2 NO, den
Ludwigstraße 23

11. MAI 1938

An

die

Preuss.

Reichs

Bibliothek


in

Berlin

senden wir Ihnen am hierher geliehene

Werk(e) (31 Bde.) mit bestem Dank zurück. Wir ersuchen,
Handschrift

den ausgestellten Empfangsschein zu vernichten.
~~uns zurückzustellen.~~



Stapleless Stationery

11/11/88

John & NO. 101

10-10-88

2 blocks: Mc 4452

11/11/88

1. ^{et} ~~responsum~~ ^{Confluen} de pace
2. Aphorismi Doctrinae Refutatum
3. Cyriacus Thrafsymachus.
4. Instrumentum pacis Oliv.
5. Nachplagen der Könige
6. Description des Königt. des Königs

3 48.
3
CYRIACI THRASYMACHI
DE JUSTITIA ARMO-
RVM SVECICORUM IN
POLONOS

Perque ea
Liberata à magno periculo
Germania

AD
ANDREAM NICANOREM
EPISTOLA.



Juxta exemplar Stetinense.

HELMESTADI,

Excudebat HENNINGVS MULLERVS

CID 13 C LV.

Rutilius de Roma.

**IUSTIS BELLORVM CAVSSIS, nec PACI
SVPERBA**

Nobilis ad SVMMAS gloria VENIS OPES.

Ms 1050892

**CYRIACVS THRASY,
MACHVS ANDREÆ NICA-
NORI**

AMICO SVO

S. P. D.

Hentidem ex me quaeris, Amice, num quas
ego censeam justificas causas esse illorum
armorum, quæ Serenissimus Potentissimus-
que Rex Carolus Gustavus, & Inclitum il-
lud Suecorum Regnum in Poloniae Regem
& Rempublicam hodie movent: an item
existimem bellum illud Polonicum Germanicæ saluti ob-
futurum, nec ne. De utroque enim per te dubium reddi,
varijs in utramque partem hominum sermonibus: non
posse tamen non sollicitudine quadam duci cum Germa-
niæ quia patria est, tum Sueciæ, quia haud dubie est Ger-
maniæ à suis quondam oppressæ liberatrix, & adversus im-
minentia pericula præsidium. Si videlicet nullæ sint justæ
Suecicorum armorum causæ, verendum esse, etsi initia fe-
liciter succedant, exigentibus id fortè Polonorum in
Deum commissis, tandem tamen fatali ruina & illa vindi-
catum iri, summo pariter Germaniæ dispendio. Ad hoc,
quasi pro lorica fuisse hætenus Poloniam Germaniæ ad-
versus barbaros populos, Moschos & Tataros: qua fra-
cta videri nos jam impofterum iri expositos eorum tyran-
nidi & incurfibus.

Ego verò agnosco animum amantem boni publici pa-
riter & intelligentem. Non est autem quare te curæ i-
sta quidem mordeant. Etenim interdum injusta quoq;
arma, (quæ Dei est sapiens humanarum rerum administra-
tio,

elo, antequam magnus ille & terribiles dies justum sceleribus supplicium decerneret) diuturna satis felicitas excipit. Suecorum vero huic bello iustificarum caussarum, quales solent ab hominibus & inter homines passim acceptari, nihil deficere: ac proinde non esse quod hactenus quidquam vereare: simul vero, nec fractis licet Polonorum rebus, periculum aliquod à Tataro Moschoque Germaniæ imminere, imo ab eo periculo nos hisce armis potissimum liberari, quoniam ita vis, docebo.

Poteras vero prius illud jam tum didicisse, si qua par erat attentione expendisses, quæ editæ sunt chartæ de causis novi huius belli. Abunde enim illæ exhibent omnia, nisi quod brevitatem sint fortassis tardiori cui Lectori nonnihil obscuriores. Non vacat sane culpa, quod illis lectis nondum acquiescas: sed vulgi sermonibus tanquam fluctu circumagi te patiaris.

Attamen, ceu promisi, dabo operam, ne quis te error amplius hac in re agitet: quoniam id postulat amicitiae nostræ ius, & tua expectatio. Ordine igitur agam: initio belli huius iustitia exposita; deinceps facti progressu ad id, ut metu libereris de imminente impostero Germaniæ à Moscho & Tataro periculo.

Nisi autem vehementer fallor, armorum quidem iustitiam clare docuero, si ostendam duo: *per Polonos scil. non per Suecos steterisse hactenus, quominus audum inter populos illos firma ac perpetua pax vignerit; Polonos porro multis modis induciarum leges fregisse, quæ sancte hactenus à Suecis sint observata, ac proinde culpa sua latissima ante tempus arma hac in sese provocasse.*

Principio igitur tenendum est, bellum Suecis cum Rege & populo Polonico non demum nuper cepisse, sed fuisse jam per annos quinquaginta sex; & quidem perpetuos; nisi

nisi quod non æque annis omnibus illud serbuerit, & semel iterum per inducias aliquamdiu fuerit quasi suspensum. Originem bellum non Sueci sed Poloni dederunt. Nec enim Suecorum aliquis antehac unquam Polonorum quenquam læserat, multo minus rempubl. eorum aliqua affecerat injuria, donec Sigismundus infestis armis, adjutus valida Polonorum manu, patrium Sueciæ regnum anno 1598 adortus est. Infeliciter quidem conatus ille cessit Sigismundo ejusque auxiliariis, imò cum non desineret injuriarum, ab Ordinibus Regni Suecici, quos penes jus illuderat, proscriptus ille est anno sequente & Regni illius dignitate exutus, neque deinceps recuperare quidquam perditæ auctoritatis potuit: moliri tamen nunquam desinit cum suis Polonis, clam palamve, prout vires ferebant, quo Regni Sueciæ statum subverteret.

Non repetam Carolo Rege hinc inde gesta. Simul gubernaculo Regni est admotus Gustaphus Adolphus, non multo post iterum more suo classicum cecinit Sigismundus: multum profecturus, nisi nondum Russico bello solutus sueta sibi imprudentia fuisset rem aggressus, & in Sueciæ populo vigneret patriæ amor novoque Regi data fides. Agebatur tunc annus sæculi huius decimus sextus. Recitabo tibi illius moliminis historiam, non meis, non alienis, forte suspecti aut non satis rerum gnari testis, sed scriptoris Poloni verbis, quo minus dubites. Est ille Paulus Piascius gente nobilis Polonus, dignitate primum Abbas Claretumbæ, inde Episcopus initio Cameracensis mox Præmisiensis, Regni Polonici senator, cujus prudentiam & candorem loquuntur quæ edidit Chronica. Is cum fecisset verba quædam de Comitibus Regni Polonici Ordinum, anno isthoc quem dixi habitis, pergit: *Subsidia quoque Sigismundo Regi pro recuperando Regno Sueciæ fuerunt promissa.* Ad

hoc enim ille animum tunc magis quam unquam alias applicaverat, persuasus quod, dum Gustavus Rex adhuc esset aetate immaturus, facile ab eius obsequio Sueci possent avocari. In quo negotio miserat quoque ad Regem Daniae suum Legatum Ioannem Veiber Praefectum Pnoensem, postmodum promotum ad Palatinatum Culmensensem, ut illius animum tempestive ad iuvandas partes suas flecteret. Nec vana erat talis coniectura, cum iste studia popularia necdum sibi devinxisset, & plures ibi adessent, qui illatas sibi à Carolo eius Patre iniurias aliqua occasione vindicare cuperent: si modo Sigismundus Rex tali opportunitati rei bene gerenda consilia cautiora coniunxisset. Verum omnia intempestive, praepostere: ac magis ad praeponendum hostem fiebant. Nihilque de istis cum Consiliariis Polonis conferebat Rex, sed cum Suecis ac Germanis tantum, qui pauci, illique rerum & praesertim belli ducendi expertes in eius Aula aderant. Michael Adolphus Comes ab Altheim, (quietiam sub hoc tempus instituendo novo ad debellandos Turcas Ordine militum speciosius quam utilius laborarat) praecipuus belli illius arbiter in se receperat, quod 20. millia militum Germanorum conscriberet, & classe in Sueciam transportaret, qui tamen nullum experimentum comparandi exercitus, vel conquirenda classis habebat. Et nihilominus expeditionis istius moderatores, praesertim Franciscus Tenagel, (carcerem & tormenta à Matthis Imperatore propter arcana Rudolphi Imper. perpeffus) quem Rex Sigismundus Cancellarium Sueciae renuntiavit, ac Gabriel Poze Suecus, illo bellico apparatu ab Altheimio promisso freti, (quasi exercitus in prociectu haberetur) bellum in Suecia divulgaverunt, typo impressis Regiis edictis per Provincias ibi sparsis, quibus populi illi contra Gustavum, uti illegitimum Regem concitarentur. Ac commoverat hoc non leviter eam gentem, rationesque Gustavi turbasset gravissimas, si ibi adfuisset praesto robur aliquod militare, cuius praesidio partes Sigismundianae fulta succrescere potuissent. Sed cum illa copia & classes Altheimii nusquam apparerent, omnes earum parti-

um ve-

am veriti exemplum, quod ibi tempore Caroli Regis multos similibus Regis Sigismundi consiliis confisos frustratosque perdiderat, sese à novandis rebus continuerunt. Gustavus quoque tali praenuntio admonitus, tempus longum habuit, ut in singulis Provinciis fideles sibi Rectores instituerit, qui diligentius omnes hostiles conatus observarent, & Patrem imitatus, praevenire periculum maluit, bellumque induxit in Livoniam anno subsequente.

Hæc Piafecius. Narraverat ille jam tum ad annum 1613 nonnulla de Sigismundi in Sueciam molitionibus, in Comitibus Warfaviensibus, frustra tamen, agitatiss. In recuperatione, inquit, Regni Sueciae subsidium à republ. tantis angustiis pressa sperari non poterat: insinuatum tamen fuit, ut admoneantur Ordines, quod Moschua, unde Rex in Sueciam divertere proposuerat, amissa, averteretur quoque tanta rei bene gerenda pro vindicando illo Regno occasio, & bellum quod inde Livonia immineret, meliori compendio Moschovicarum virum averci potuisset. Narrat idem in descriptione rerum anno 17 & 18 gestarum, expeditionem Suecorum, classico Sigismundi excitum, in Livoniam duce Farensbachio institutam, eiusque proditione post corruptam: ut &, quemadmodum maiore felicitate ipse Rex Gustavus Adolphus anno 21. in Livonia Rigam occupaverit, anno autem 23 Sigismundus nova clam agitavit consilia de transferendo in Sueciam bello, quæ Gustavi adventus turbaverit. Sed hæc nihil ad rem nostram. eoque non est quare hoc loco repetantur.

Quamvis verò omnia infelicitè Sigismundo ac Polonis, Gustavo autem Adolpho Regi ex voto quasi cessarent, non tamen Gustavus Adolphus Rex Regniue Suecici Ordines pacem Polonis offerre æquis conditionibus iam tum anno 23. omiserunt. Non dissimulavit hoc Piafecius. Verba eius hæc sunt de Rege Sueco: Pra se ferebat ille tunc, quod ad tractandam pacem inclinaret: sed tam importune, absque

præpar-

preparatione, cum hoste tam superba ostentatione tumente, tractare, indignum videbatur. Stabat in anchoris nimirum prope Gedanum Gustavi classis, excita illo rumore de transferendo bello in Sueciam: impar erat gerendo bello. Sigismundus, & tamen indignum scilicet Polonis visum pacis oblatæ consilia agitare.

Sequente anno 24, irritis Comitibus Warsaviensibus, ob populi Polonici dissidia, etsi summe tenues essent Polonorum vires, Suecorum interim res in Livonia florent, rursum pax Polonis oblata fuit, sed frustra. Dabo iterum testem illum Piafecium. In privatis, ait, colloquiis Proceres, maxime Lithuani, Regi suadebant, ut consideret quod populi totius Regni bellis præteritis exhansti, ad vocem tributi sumptusque bellicos subministrandos induruerant, eoque bellum Suecicum difficilius duci posset, potius honestis mediis cum illo hoste transigeret. Ac proponebant conditiones pacis non indecoras, quas fidesimi Gustavi Regis Sueci familiares suggererant: nempe ut restituta regno Polonia Livonia, universam Esthoniæ & Finlandiæ cum ipse successione in regno Suecia, si Gustavus decederet sine prole mascula, unus ex filiis Sigismundi Regis haberet: titulo quoque Regis Sueciæ Rex Sigismundus uteretur, dummodo Gustavus cum eodem titulo Regio Regnum Suecicum secure teneret. Sed nihil profecerunt.

Anno 25 denuo pacem perennem, vel saltem longas inducias Polonis Sueci, florentissimis rebus, obtulerunt: iterum verò reiecti sunt à Polonis. En testem tibi illum eundem Piafecium. Præcipuum inquit, deliberationum Comitum: caput fuit de bello cum Suecis Livonico: ad quod isti dum Inducia ad mensem Aprilem proximum stabilitæ finirent, maiores vires apparabant. Nec induci poterant ad prorogandas illas inducias in tractatu interim super hoc habito, nisi Rex Sigismundus eas longiores, nempe in multos annos esse velleret, vel Sueciæ Regno se abdicaret, pacemque faceret perennem. Et maiores illi sumpserant animos,

cum in-

tam inaudissent in Conventibus Terrarum (qui antecedere solent Comitibus Generalia) Polonia Ordines à bello abhorrere, suisque Nutriis ad ista Comitibus mandata dedisse, ut nulla tributa pro impensis belli illius concederent; quibus Regem Sigismundum destitutum, etiam iniquiores conditiones pacis suscepturum Sueci sperabant. Nec eos fefellit coniectura quoad tributa; exigua enim fuerunt concessa & quæ vix debito in præteritis expeditionibus contracto exolvendo sufficerent. Sed tamen Rex leges pacis aut induciarum ab ipsis propositas non probavit: quamvis Proceres evidentioribus argumentis reliquæ Livoniæ iacturam & maiora Reipublicæ incommoda inde nascitura demonstrarent.

Vindicavit tam iniquam repulsam Deus, & illo quidem anno omnem Livoniam, excepto uno Dunæ mundo, sequente magnam Prussiæ partem, donavit felicibus Suecorum armis; Iaroslaviam quoque urbem, penu locupletissimum totius Poloniæ, subito incendio perdidit.

Interea tamen Gustavus Rex tractatum pacis institui petiit, teste eodem Piafecio pag. 385 (utor editione Batavica) imò anno 27 per Legatos Hollandicos, vel pacem vel triginta annorum inducias amplissimis conditionibus offert Polono, sed, ut antehac semper, frustra. Audi quæso narrantem & hoc Piafecium. Legati Hollandici sic abruptum de pace tractanda colloquium, adveniente ad castra Rege Sigismundo Mense Septembr. iterum instaurarant, & prope ad optatum finem perduxerant, adnitentibus Proceribus Polonia, Regemque suum pro tranquillitate publica deprecantibus. Tanto magis quod Gustavus omnium ablatorum restitutionem offerret, præter Rigam, quam ad plenam super jure successionis in Regno Sueciæ durantibus triginta annorum induciis faciendam decisionem, retinere voluerat. Sed totum illud negotium pene maturum, evertit nova Regi de recuperando Regno Sueciæ spes iniecta ab Austriacis, quorum intererat, ut Gustavus bello Polonico distineretur & à

B

Germa-

Germanicis rebus averteretur. Ad finem enim tractatum, cum postridie pax leges concludi & publicari debuissent, advenerat cum Stanislao akowski ab Hispano Rege missus Gabriel Roy, & paulo post eius collega Baro de . . . hi, qui promissit: quod intra duos menses Regis Hispaniae impensis, classis viginti quatuor navium bellicarum in sinu Baltico comparanda esset, eiq; imponendi duodecim mille milites, à Valnstenio iam ad hoc destinati, in Sueciam traicere, ibiq; sedem belli figere deberent, ac impensis Regis Hispaniae sustentari, donec bellum duraret. Ad quod ducenta millia talerorum Imperialium in collybis se habere prompta dicebat. Tam speciosus itaq; promissis confusus Rex, induciis pro Regno Suecia, quod vivens illis auxiliis recuperare maluisset, longioribus subscribere renuit, & rebus infectis Varsoviam rediit ad Comitum Regni.

Delusus fuerat ab Hispano Sigismundus, adhuc classem novem instructissimarum navium perdiderat, Gustavo contra pluraque feliciter successerant; hic tamen promptus fuit ad acceptandas inducias, interventu Galliae & Angliae Regum, ex usu Poloniae potius quam suo anno 29 pactas, Sigismundus verò perdifficilis. Difertè idem testatur Piasecius; Regem talem pacem improbasse. Exoratus tamen, addit, à Senatu, ut bellum illud tam difficile ad feliciora ciubl. tempora differret, eam suscepit, approbatiq; publico Ordinum decreto permisit. Audi vero fides & Stanislauum à Kobierzycko. Kobierzicki, Castellani Gedanensem, florentissimum historiae Vladislai Principis scriptorem. Verba ejus hæc sunt l. ix. pag. 926. Tandem bellum illud Prutenicum quod ultra quadriennium gestum erat, induciis in quinquennium stabilitis conquievit. At Rex Sigismundus difficulter in eas consenserat, & antea multoties sollicitatus ab Ordinibus, ut honestis, quas offerebant, Sueci conditionibus, vel perpetuam, vel plurimum annorum termino circumscriptam conficeret pacem, neve rempubl.

rempubl. molesto implicaret bello, nunquam adduci potuit, spei injecla ab Austriacis ultra modum memor tenaxq;, quam illi ad recuperandum patrium regnum fecerant. Multa alia idem ille laudato anteloco narrat, quæ luculente docent, quantum inhiarit etiam tum Sigismundus vanis Hispanorum promissis, de invadenda Suecia: plura forte additurus, nisi illum classis Hispanica, quam Hollandi post Trompio duce deleverunt, consilia latuissent.

Tertius insecutus annus Gustavum pariter & Sigismundum extinxit. Nemo tamen non facile videt, quamdiu quidem Gustavus potitus est rerum, per Polonos stetit solus, quo minus firma pax inter utrumque regnum coierit. Eluxit sane idem studium pacis in Gustavo, etiam defuncto jam Sigismundo, quod ad Polonicum Senatum interregni tempore misso Legato, studiose illum monuerit ea agere, quæ imposterum paci componendæ possent prodesse. Narrabo & rem illam verbis Piasecij qualia habentur pag. 452. Orator (inquit) ille repetitis longo temporum ordine principiis culta Polonis cum Suecis amicitia, eandem fato malo interruptam, cum jam, inquit, obicem fors removeris (Sigismundum Regem innuebat, ne verbo tamen eum laesit auz nominavit) facile reconciliari posse, Suecorumq; studium ad hoc non defore asserbat. Iteratq; Orationis suæ argumentis persuadere conabatur, ut Ordines dum sui juris essent, & priusquam Regem eligerent, ea omnia, quæ reconciliationem hujusmodi, pacemq; tractandam impedirent, tollere studerent. Nempe ut non eligerent Regem ex Regis Sigismundi filiis, nisi prius isti renunciarent hereditati Regni Suecia: quod unicum pro renovanda cum Regno Polonia pace perpetua Suecus Rex exposcebat. Responditq; ei Archiepiscopus ac Marischallus Equestris, Rempubliacam à pace justa & honesta non abhorrecere, & circa electionem Regis ea quæ Rempubliica futura essent, curare velle. Tandem anno 35 pactæ sunt

sunt Stumndorfianæ postremæ induciæ in annos sex & viginti. Etiam tum vero Sueci pacem maluissent impediverunt autem Vladislaus Rex ejusque fratres, & quibus eorum favor potior fuit quam salus publica. Disertè Piascius pag. 480. *Et quidem propositum omnibus erat, universas inter hæc Regna controversias sopire, solidamq; in perpetuum pacem stabilire. Sed cum Rex Vladislaus cum suis germanis fratribus, uti Sueci requirebant, titulo Regis Sueciæ, & iure hereditariæ successionis in Regno Sueciæ abdicari (licet hoc circa suam inaugurationem Polonis syngrapha secretiori caverat) omnino nollet; nonnisi induciæ ad annos viginti sex, nempe ad undecimam mensis Julii diem, Anno Christi 1661 fuerunt stabilitæ. Imo ipsæ illarum induciarum leges pacis studium in Suecis manifestum fecerunt. Reddiderunt enim hi Polonis Elbingam, Mariæburgum, Dirschaviam, Brunsbergam, Pilaviam, & in universum omne quicquid Prussiæ occupaverant, sola Livonia sibi retenta; simulque pepigerunt, ut durantibus induciis semel atque iterum de pace componenda ageretur.*

Nec vero etiâ illas de pace tandem aliquando constituenda tractationes Sueci, quantum in ipsis fuit, intermiserunt. Bis magnis factis sumptibus, & corrogatis hinc inde Mediatoribus, Legati Lybecam illi fini missi sunt. Advenerunt quidem & Polonici. Sed hi primo statim congressu non dubitarunt producere tabulas plenipotenciales, quas appellant, non tantum multis vitiis refertas, verum tales etiam, quibus Polonus Rex Sueciæ Regem sese diceret, atq; ita Regnum Sueciæ sibi palam vindicaret. Veritum id omne disertè erat legibus nuperis induciarum, atque adeo ne quidem salvis induciis id licebat; quæ potuit hoc ergo tolerari cum de componenda pace ageretur? Nonne aperte illud nudavit, statim circa initia, à pace alienum animum? Serio moniti Poloni Legati à Legato Galliæ Regis, nego-

negotiorum pacis mediatore, agnoverunt etiam ipsi delictum, polliciti intra tres quatuorve hebdomades, emendata hac culpa, novis tabulis justo Suecorum Commissariorum desiderio se satisfacturos. At quid fit? Abeunt dies, abeunt hebdomades indictæ, magna sumptuum, maxima temporis jactura. Conventi iterum Polonici Legati, postremo affirmant: *non se fuisse ausos Regem suum de omitendo titulo Regum Sueciæ compellere.* Non temere quidem id crediderit haud nescius, quanta procerum Polonorum in Regem sit auctoritas. Esto vero. At si Rex contra pacta conventa ne titulo quidem illo voluit abstinere, & si Commissariis ejus certum fuit, hoc etiam indignum facinus approbare, nonne liquet Polonis studium pacis, tum sane, ne quidem fuisse cordi?

Frustrancum hunc de pace primum congressum excipit non multo post alter. Et si enim iusta indignatione moti Sueci potuissent secundum conventum Polonis denegare, noluerunt tamen in se quidquam desiderari eorum quæ ad pacem reducendam faciunt; quò tandem aliquando quieti publicæ Regnorum consuleretur. Legati Suecici exhibuerunt suas quas vocamus plenipotencias. In iis nemus quidem aliquid quod reprehenderet, potuit invenire. Polonorum vero tabulæ inscriptum quidem illum titulum non dederunt; in sigillo tamen & Regni Sueciæ insignia pariter & Regis Sueciæ nomen aperte præ se tulerunt. Quod est altera manu lapidem altera panem porrigere. Et vero hoc quoque ludibrium ipsis induciarum legibus receptisque moribus adversari, agnovit ipsemet Zadzechius, caput Legationis Polonicæ regni que magnus Cancellarius; agnoverunt Angliæ pariter & Foederatorum Belgico-Germaniæ Ordinum Legati, pacis tractatum futuri mediatores. Quæsti hanc novam injuriam quidem

quidem sunt Sueci & quidem jure merito; paratos tamen sese ostenderunt non modo ignoscere & huic culpæ, sed expectare Lybecæ emendationem, quo integris tabulis procuratorijs tandem aliquando sanctum pacis negotium liceat aggredi. Vrserunt illam emendationem Moderatores etiam atque etiam. Frustra & hæc omnia. Post longam tergiversationem responsum denique est à Polonis: *Regem suum Cosackis debellandis occupatum vix admissurum sigilli mutationem: utq. id persuaderi possit, non tamen ibi in promptu fore artificem sigillis sculpendis idoneum.* Quasi vero ingens opus sit sigillum sculpere, & si non in castris, tamen in vicinis oppidis desint id qui præstent. Ita denuo Poloni cum Rege suo, ne id quidem, quod paci componendæ ceu fundamentum ex pacto jam substratum erat, ratum habentes, adversum paci animum palam præ sese ferre haud sunt verecundati.

Paulo antequam Regni aviti sceptrâ inusitato exemplo deponeret Serenissima Christina, advenit quidem Holmiam Legatus à Poloniæ Rege missus ad Reginam Canazilius, affirmans Regem Regniq.ue Poloniæ Proceres, suos Legatos plenipotentijs exacte instructos in Sueciam missuros, qui de pace transigerent. Sed quis prudens non advertit, tantum in speciem hoc actum, non serio, postelufos binos illos per induciarum leges indictos tolemnes de Pace congressus? Imo quis non suspicetur aliquid monstri Legationem illam aluisse; utpote quum ipso illo tempore novanda esset Regni Suecici administratio, quam sibi uni jure deberi Rex Polonus noluerat hætenus vel leviter dissimulare?

Pro candore suo, & qua pollet, animi generositate, non potuit hoc noviter tum constitutus Rex Serenissimus Carolus Gustavus dissimulare; nec tamen etiam ita ipse

ipse desit, ad seriam de Pace tractationem vel tandem aggrediendam, Regem Proceresque Polonos invitare. Hinc per ipsummet Regni Sueciæ Magnum Cancellarium, ut senio gravem ita meritis longe Illustrissimum, Oxenstiernam, Canizilio jussit responderi. *Se quidem teneri singulari desiderio componendi isthac diuturna & cruenta utriusq. Regni discordia: sed antecedentium temporum vestigijs admonitum vereri merito, vel eadem qua hætenus data sunt ludibria & injurias, vel rerum inania & elusorias procrastinationes. Nec verofas esse aut satis ex decoro, perinde ut factum antehac: postulandis mediatoribus molestiam Regibus & Principibus exteris creare; specioso apparatu quasi maxima acturos in conspectum orbis prodire, at mox obice agendis rebus injecto discedere. Quo ludibrium vicinis gentibus, inter Regna pacanda mutua suspiciones, animi conciliandi ad magna odia commoventur. Inanciarum legibus per binos, etsi irritos, congressus, à parte Sueciæ abunde esse satisfactum. Cum primis eo, quod Regis Poloniae ludibrijs semel iterumq. in primo Lybecensi conventu Suecia ignoraverit. Quod idem Rex solemniter per actus primi congressus admonitus, non dubitaverit etiam alterum congressum iisdem prope ludibrijs rumpere, id vero vel patientissimi Principis animum ledere. Si tamen etiamnum cordi sit Polonia Regi pax certa, solida, & duratura, prætermittis tandem aliquando illis inutilibus præjudiciorum injuriarumq. plenis legationibus, veniret ille & Respubl. Polonica per idoneos plenipotentarios ad rem ipsam pacis, sine ulterioribus ambagibus, & quidem cito. Experturos Polonos in omnibus Regiam suam aquanimitatem. Discordia Regnorum Sueciæ & Poloniae alias gentes non tangere. Solo longo annorum decursu merito esse debere oblitterata. Quo compendiosius eo rectius componi omnia. Si non placeat Regi & proceribus Poloniae ea pacis compositio, nihil sua interesse. Profuturum tamen, si Legatus nullus redeat non satis munitus facultate componendæ pacis, Sin, fore id sibi*

*sibi certo documento, non pacis desiderio, sed quocumq; alio potius consilio ambages illas institui. Et vero si pergant Poloni mittere eos Legatos qui sese orbemq; universum decipiant, aut literas juri-
bus dignitatq; Regni Suecia derogantes, non posse non sese 102 do-
cumentis edoctum aliud judicare, quam Regem Polonia susq; deg;
habere sacrosanctam pactorum fidem.*

Cum hoc acri responso, quod tamen simul seriam ad pacem adhortationem comprehendit, dimissus ad suos est Canazilius. Indubie & Regi pariter & Proceribus Polonia nihil non horum ex fide ille retulit. Nonne par itaque fuisset, cum alterutrum ut agerent usque adeo serio admoniti essent, vel tandem mittere idoneos componendæ pacis Legatos, vel saltem in idoneis mittendis gliscentes jam suspensiones non fovere, & animos ægros non porro accendere, si Polonis fuit aliquod pacis non fucatum studium?

Verum hisce etiam omnibus habitis insuper, advenit Holmiam superiore hyeme ex Polonia missus Ioannes Morstenus, non instructus facultate componendæ pacis, sed quantum præ se ferebat, paraturus tantum præliminaria, quæ dicuntur, circa locum & tempus futurorum de pace tractatum. Directe hoc adversabatur illi per Canazilium dato responso Regio. Iussus ex more, antequam admitteretur Morstenus, apographum fiducialium literarum exhibere, produxit tabulas, in quibus et si utriusque Regis titulis solito rectius fuerit cautum, sub finem tamen numerati sunt Poloni Regis Regnorum anni: vana quidem, occulta nihilominus juris in Sueciæ Regnum, ex more consueto, commemoratione. Cumque studiose fuisset inter Reges pactum, de vocula & cætera, quibusdam tituli Regij vocibus adijcienda, omissam illam esse deprehensum est. Minutias dixeris: at in illis latent grandia, & toleratæ

toleratæ ad solidas injurias inveniunt viam. Posterius sane conjunctum est cum tacito Regis Sueciæ præ Polono vilipendio, quasi ille hoc sit inferior. Prius arcanam juri-
um in Sueciæ Regnum vindicationem continet: rem & Regi & Ordinibus Regni Sueciæ neutiquam tolerandam. Si minutia sunt, quare per illas Polonia Rex pungere Regem Sueciæ voluit? Certe etiam hæc arguunt, quam ille sit animo à vera concordia alieno.

Morstenius culpam excusare conatus est, incuria scribarum Regionum. Sed quis non videt hoc quam sit frigidum? Quasi scribis Polonicis solemne sit, errare in solis literis ad Reges Sueciæ scribendis. Et vero incuria scribentium, ab ijs, quibus relegere scripta in officio est, quare emendata non est? Enimvero ipsamet talis incuria conjuncta est cum contemptu. Nec enim per incuriam tractari solent res grandes & majoris momenti: quales utiq; sunt quæ paci aut bello possunt ansam aut fomentum dare.

Commovit hæc quidem recens injuria generosum Regis animum; sufficere tamen in pœnam credidit, nec literas ipsas nec Morstenium tanquam internuncium admittere. Quo nihilominus ostenderet Rex, adhuc sibi esse animum in pacem propensum, benignissime Morstenio significari fecit: *Quamvis Rex non amplius obligetur illi per Canazilium data declarationi de admittenda pacis tractatione, cum illam irritam Poloni reddiderint; non passurum tamen divelli se à constante instituto de pace rebus omnibus præferenda, si ea quæ per Canazilium indicata est ratione, citra ambages, & ex necessitate horum temporum, talis pax obtineri possit, qua dignitati Regiæ ac Regni, & subditorum securitati, in posterum satis est prospectum.* Idem per Senatores Regni Sueciæ ad Senatores Regni Poloniae plenius perscribi Rex curavit. Et vero indubie

C

visa

visa tibi est, Amice, & lecta illa Senatorum Suecicorum epistola. Si sane eam qua decet cura expendere, liquido apparebit, & serio illos studuisse componendæ paci, & Senatores Poloniæ, gravissimis adductis rationibus, ad pacem, quasi solemnibus literis, invitatos esse. Ex adverso in Polonia etiam hæc monita vel surdis auribus vel non æquis animis videntur excepta: etsi ipsæ illorum res afflictissimæ nullum promptius remedium quam solidam cum Suecis pacem flagitarent. Quod sane equidem sciam, Legati nulli de componendâ pace advenierunt ex Polonia, nisi cum jam pars exercitus Regij excubaret in illorum finibus, & ipse Rex armatus staret in procinctu.

Igitur Suecos hostilia agitare in Polonos justissimis de causis, utique ex hisce omnibus palam est. Qui enim illi animo alio fuerint, cum Poloni pacem omnem toties honestis conditionibus oblatam repudiaverint? Nec verò licet non hostem agere in eum, qui pax quo minus coeat obnititur, nisi opprimi velis.

Ceterum dixeris tu fortassis, Inducias tamen pactas inter utrumque populum in annos sex & viginti, ac proinde anno demum sexagesimo primo finiendas; quas præpropere adeo infestis armis abrumpi, nefas esse. At vero quis sive justus sive prudens affirmaverit, omnium omnino induciarum, nullo habito discrimine, finem demum semper expectandum? Interdum arma justissime maturari in partem, quæ fidem induciarum fregit, apud omnes gentes receptum est. Attende vero, mi Nicanor, quemadmodum circa inducias sese Poloni gesserint, & Vladislao pariter & Ioanne Casimiro Regibus.

Fervebat Vladislao vivo bellum Suecorum cum Cæsare, cautumque lege erat: *Quod Rex Vladislavus ac ejus successores Reges Polonia, utque Regnum Polonia & Magnus Du-*
catus

atus Lithuania, cum provinciis & Principibus sibi subiectis, nil hostile moliri debeant durantibus istis induciis, contra Christinam Reginam Regnumque Suecia & ejus provincias ac civitates, & nulla classe armata uti, neque eam aliis quibuscunque subministrare contra illud Regnum.

Non numerabo inter læsa conventa, quod simul induciæ pactæ sunt, sex millia equitum Polonorum, duce Paulo Noskonski præfecto Lomziacensi, signa Cæsarea acceperint; etsi hostiles vires permultum eo creverunt. Idque quoniam non proxime in Suecos, sed illorum fœderatos Gallos tantum illi pugnaverint, quodque proceres Poloniæ illos mox severis edictis in patriam revocaverint. Accepto nimirum hanc excusationem. Non computabo etiam inter injurias, quod Polonorum alij multi Cæsari adversus Suecos ipsos militaverint. Nemo hoc Polonis hætenus non condonavit: eoque nihil habuit causæ nuperus Polonus Legatus Christophorus Przimski, cur id defenderet à culpæ criminatione. Frustra sane excusas quod incusatus nemo.

At vero quod per mediam Poloniam Cæsareus hostilis miles, nemine vetante, nemine vel leviter sese opponente, bis in provincias Regno Suedico subditas Vladislao Rege penetraverit; hoc vero non vacat culpa fractæ fidei. Prima excursio fuit Botio duce in Livoniam nihil hostile tū expectantem. Altera in Pomeraniam duce Crockovio. Ad neutram hosti fuit aditus nisi per mediam Poloniam. Non alia etiam via utraque incursum fuit instituta; non alia repulsi hostis se recepit & ultimum exercitum exitavit. Quis non videt, talia institui non potuisse, nisi republica Polonica, non connivente tantum, sed conspirante clanculum in exitium Suecicorum exercituum? Nec sane talia fieri solent in Regno rebus suis saragente. Erat vero

ipsa quasi salus Suedici exercitus collocata saltem in Pomerania tranquilla possessione: quam proinde plurimum profecto laxisset Crockovius, nisi celeritate & felicitate Konigsmarckij fuisset oppressus. Hunc vero non solum per Poloniā invadere Poloni permiserunt: sed monitus etiam & rogatus à Regni Suedici Senatoribus Senatus Polonicus, saltem ut redire hominem prohiberet, hunc tamen per Poloniam effugere passus est quidem, Konigsmarckio autem persequenti transitum denegavit. Imo illi Crockovio ex arce Pucense aliisque Poloniæ castellis arma ac tormenta bellica submissa sunt. Botij irruptionem, conquerentibus Regni Suedici proceribus, excusare quidem conati sunt Poloni, frigide tamen, ignorantiam caussati. Ut in Crockoviano hoc negotio nullo eos colore fucaveris, à culpa hostilium molitionum contra induciarum leges.

Porro cum Oeseliā in insulam Danus Regno Sueciæ cessisset, inter reliquas pacis condiciones, idem ille Vladislaus Rex non dubitavit insulanos ad defectionem à Suecis, in Regni Poloniæ ditionem, misso multis cum literis & mandatis ad Oeselienses suo nobili Camerario Bergio, invitare. Literæ quam multæ hodieque superant: & palam adeo res acta est, ut negari non potuerit à quoquam. Eo vero conatu ruptam induciarum illam quam præmisi-mus legem, non minus luce meridiana est clarius. Quid enim est *moliri* aliquid *contra Regni Suedici provincias*, si hoc non est?

Ad hoc Vladislaus ille Rex ipsos quoque Livonos sollicitavit, ad defectionem à Suecis. Clanculariis quidem artibus res, ut solet, gesta est, emanavit tamen & plurimis testimoniis innotuit; usque adeo, ut nec hæ molitiones queant fronte haud erubescere negari.

Magis arcanis consiliis agitati fuerunt conatus Vladislai cum

Sai cum Christiano IV Daniæ Rege, cum Arnhemio, & Baudisio; ita tamen, ut prudentem neminem temere fefellerint, in perniciem Regni Suedici eos institutos, solo Numine frustrante iniqua facinora.

Hæc omnia jam tum Vladislao Rege contigerunt. A Ioanne Casimiro nemo non Sueciæ Procerum, cum Regina ipsa Christina & Rege Carolo Gustavo, maiorem pactorum fidē expectasset. Defuncto Vladislao fratre, rogata ab illo pariter fratreque ejus Carolo Ferdinando, de eligendo Rege consultantibus Polonis Serenissima Regina Ioannem Casimirum in Regem studiose accurateq; commendaverat: ac proinde omnium una spes erat, tandem aliquando vetus carcinoma, post tot annorum intervallum, animorum æstu jam defervescente, remedium admittere, inque id Ioannem Casimirum novo beneficio devinctum, operam sedulo daturum. Accedebat quod Poloni à Colaccis, Tataris, Moschis undique premerentur, domi consiliis viribusque, foris auxiliis omnium Christianarum gentium nudati. Quis itaque non sperasset, saltem nunc serio incubituros cum suo Rege Polonos paci, aut minimum induciis cum Sueco pactis? Quid tum Poloni? Piascius ipse p. 509 testatur, propendisse illos magis in Casimirum Regem eligendum quam fratrem ejus Carolum Ferdinandum, quod esset *sufficiens prerogativa hereditarij tituli Regis Sueciæ*. Septennium circiter est, cum Ioannes Casimirus potiri rerum cœpit: tantum abest vero illum interea serio consilia pacis agitalle, utpote ne nunquam defuisse dixeris fidem induciarum violare. Harum legibus adjectum erat, quid in titulis Regiis utrinque observari debeat, & quidem Poloniæ Regibus abstinendum à titulo Regum Sueciæ: imo hoc quasi in basin substratum fuit induciis, utpote quum eo caveretur Regno Sueciæ de libertate sua, Regibus de securitate.

tate. At vero novus hic Rex nunc vafro commento u-
sus, lingua & more Gallico literas scripsit (quas antiqua
consuetudo Latinas exigit) ne scilicet ita videretur abstinu-
isse debito sibi titulo, aut Reginae indebitum tribuisse: nunc
Latine scribens, palam sive in sigillo sive in ipso titulo no-
men Regis Sueciae sibi usurpavit. Nunquam, id quod le-
ge erat cautum ut observaret, potuit induci: etsi bis so-
lemnis de pace tractatus ea una pene de causa irriti reddi-
ti sint, ceu jam ante narravimus. Nec vero Regina duri-
taxat hisce ludibriis a Rege illo fuit contra induciarum pa-
cta perpetuo exagitata, sed & Rex Carolus Gustavus,
quamvis erga hunc solito modestiorem sese exhibuerit.

Audivisti de injuriis hisce monitos ipsos Regni Polo-
niae Senatores a Senatoribus Regni Sueciae. Dum exspe-
ctatur emendatio, ex variis locis certissimis testimoniis ad-
fertur, Regem Poloniae, more sui fratris, Livonos ad de-
fectionem invitare, imo illos pacandis Cotaekis in praedam
offerre. Quae *molitio* inimica quam maxime est utique fan-
ctis induciarum pactis. Nec vero est quod existimes, in-
certo hac rumore niti, cum in promptu sint testimonia
quamplura.

Nec his contentus Rex ille, nova etiam foedera molit-
ur, tantum in perniciem Regni Sueciae. Novisti, Ni-
canor, quanti interstitiius Regni, ne qua peregrina classis
Balthico mari incumbat. Veritur in eo sane salus Regni:
utpote cujus provincia pleraque mari illo alluantur, ac
proinde exposita sint incurtibus cujusque valida classis, si
sit infesta. Hinc prudenter caverunt dudum Reges Se-
natoresque Regni Sueciae, ne qua classis peregrina maris
illius tranquillitati perturbaret. Diserte in pactum in-
duciarum est receptum, quod jam audivisti: ne Polonus ar-
mata classe utatur, nec eam aliis subministrare in Regem Sueciae de-

testimonium. Ex adverso Rex Polonus, vicinos amicosque
Suecorum, praesertim mare Balthicum vel accolentes vel
navigantes, solis Suecis exclusis, omni studio allicit in foe-
dus de paranda classe, & quidem peregrinis viribus maxi-
me fulcienda, foederis formula jam concepta. Non in-
diget Poloniae Regnum classe, saltem quamdiu induciae va-
lent? Quare ergo jam classem meditatur nisi in Suecici
Regni damnum? Quir ab illo suo novo foedere solos Sue-
cos exclusos vult? Certe communis boni si quod ab illa
classe fuerit expectandum, etiam hi utique participes de-
bebant esse, quum omne mare illud Balthicum finibus
Suedicis potissimum sit inclusum. Id prorsus intolerabi-
le, hac agitari ipso illo tempore quo pacis componendae
caussa in Sueciam Legati a Polono sunt missi. Cui enim
prudenti non suboleat, missitationes illas institui fraude
quodam; ut nimirum eo tutius laterent insidiae, & Sueci
pacis spe inflati, minus debito rebus suis attendentes, eo
promptius circumvenirentur.

Tot modis uno non integro septennio, non dubita-
vit, in summa licet virium suarum debilitate, laceessere Sue-
cos contra induciarum leges Rex ille Ioannes Casimirus.
Quid censes fuisse facturum, si animo facultates respon-
dissent? Sed non est quare quidquam divinemus de futu-
ro, cum nimis liquido pateat, quantum non Vladislaus
tantum, sed Ioannes quoque Casimirus Rex sanctam fidem
induciarum violaverint fregerintque. Dixeris forte, om-
nia haec nullo successu facta & incassum: ac proinde non
oportere vanos conatus revocari ad animum. At vero ip-
sas *molitiones* quasque jam percepisti induciarum legibus
esse veritas. Et vero quae sint induciae illae, quarum ope
non sis tutus adversus molitiones? Certe bellum aper-
tum utilius fuerit illa quiete, quae molitionibus quibusve
hosti-

hostilibus exposita est. Nemo profecto prudens talem quietem feret, aut illam hoc nomine dignabitur. Quis itaque non merito indignetur, si sentiat nunquam se non peti molitionibus occultis, quo tempore sacramento tranquillitas firmata erat? Nullum sane majus argumentum est iniqui & superbi animi, quam si viribus destitutus injuriarum non desinas. Insolentiam in potente ut excuses, in debili intoleranda est.

Sed soli Reges peccaverunt forte, nulla rei publicæ Polonica integræ culpa. At vero, utique non potuerunt Regni Senatores latere, ea qua memoravimus facinora, quæ in vulgus pene omnia innotuerint. De quam multis conquestum apud illos sæpius est. Quare itaque passi sunt Reges suos ita inolescere contra pacta conventa totius rei publicæ? Parcere nimirum voluerunt Regibus quo gratiam eorum obtinerent, quasi tanti non sit in Sueciam peccare. Aperte sane id patuit primo de pace Lubecensi congressu, quum post longam moram tandem Legati causarentur, non se ausos Regem suum de mutando titulo appellare. Atqui apud omnes populos recepti est juris, ut rei publ. universæ imputetur crimen, in quod cum possit & debeat illa animadvertere, permittit impune: nec à moribus Polonicis est alienum, sed satis familiare, Regum actus severe improbare ac perstringere. Itaque quod ad hæc omnia præter morem maluerint connivere, culpa jam omnium facta est & communis & publica.

Sed dixeris: Cautum tamen fuisse induciarum legibus, ut de iniuriis interea temporis abortis, utrinque circa Livonia fines conventus fierent, per commissarios, salvis induciis. Ita est. At non est pactum, onus petendi Commissiones illas Suecis incumbere. Conquesti Sueci sunt sæpius de iis quæ fierent adversus pacta, apud Reges & Senatores Regni Poloniae.

Poloniae. Polonorum itaque erat, querelis illis commoda excusatione aliqua diluendis, conventus indicere aut petere: utpote cum non Sueci sed Poloni injuriarum & fractæ fidei arguerentur. At vero ne quidem semel ab iis id serio factum est. Imo quandoque ad Suecorum querelas ne quidem per literas aliquid est responsum; alias non nisi frigida excusatione querelæ rejectæ, inani obtentu scilicet ignorantia in publica omnium conscientia, vel extenuatione iniqua committi facinoris. Quem fructum ergo etiam Commissionum potuerunt sperare Sueci, si quas petissent, tam indigne habiti? Et vero, nonne Lybecenses bi-ni illi de pace congressus, in quibus non dubitaverunt Poloni ipsa Induciarum pacta violare, & plenipotentias vitiiosissimas producere, satis ostendunt, quam futuri fuissent inutiles si non perniciosi de sopiendis querelis conventus? Non fuit sane ex dignitate Regni Suecici, etiam post acceptas injurias, à Polonis emendicare commissiones illas quas vocant. Poloni quod hac in re jure imputent Suecis, non habent: cum ipsi crediderint infra suam dignitatem esse, læsis etiam & conquerentibus Suecis mitigandis, conventus ejusmodi procurare.

Hisce omnibus ad hunc modum non nihil majore cura abs te expensis, nonne jam vides, Nicanor, potuisse merito Suecos vel paci renunciare, si quæ illis pax cum Polonis intercessisset? Certe similibus de causis gentes pacatissimas passim ad arma convolare, idque bellum non injustum videri, notissimum est. Illis sane populis, qui maxime nunc accusant Suecorum arma, longe levioribus prætextibus bellum gerere, solemne est. Ut facile appareat, uri illos potius felice armorum successu, quam injustitia; & hanc non nisi inane invidiae odiique esse pallium.

Si pacis vero tempore ejusmodi injuriæ bellum merentur,

antur, quanto magis non nisi per inducias suspensis armis? Multum interest scilicet, Nicanor, inter pacis & induciarum status, nec quod in illo idem & in hoc tolerabile videtur, aut venia dignum. Rectissime Gellius: *non pax est inducia, bellum enim manet, pugna cessat.* Stricti juris omnia sunt per inducias: adeo ut si pars minus ex fide illas observet, alteri parti mox jus in sese det armorum, nisi speciali conventionem aliter sit pactum. Qualiratione non vivitur in pace.

Video nonnullos haud quidem diffiteri, justo dolore mortuos Suecos arma tandem corripuisse: arbitrari tamen, dissimulandas fuisse omnes injurias & condonandas, quod jam tum Poloni misere affligerentur: nec enim afflictio addendam afflictionem. Quorum probitas vehementer placet. At si afflictus aliquis, nec injuria forte afflictus, non desinat alios quietos hactenus & sibi indulgentes injuriis laceßere, imo in perniciem eorum conspirare, an is propterea dignus est misericordia quia jam tum affligitur? Neutiquam. Extremæ enim signum est insolentiæ, etiam inter adversa moderari non posse impotenti animo; ac proinde poena dignum est exquisitissima. Quid si certissimum sit, fore ut is qui jam affligitur, ubi liberatus fuerit ab ærumnis, te majore solito damno afficiat, an pietas exigit parcere illi afflictio, donec emerferit? Non sane hoc exigit pietas, & fuerit hoc summæ imprudentiæ. Ad hoc, est quædam afflictio interdum alterius afflictionis remedium. Perinde ac dolor dolori nonnunquam medetur. Itaque est interdum etiam ex re ejus qui affligitur, ut denuo affligatur. Habent hæc omnia in Polonis locum. Non desierunt illi hactenus, rebus etiam turbulentissimis maximeque afflictis, inducias Suedicas violare, illique reipublicæ frueretur insidias contra conventa pacta; cen audivisti. Certum

tum est ex signis innumeris, Polonos recuperatis viribus infestissimos hostes futuros Regno Sueciæ, & nihil nunc conatibus obstare perinde, atque ea quibus cum conflitantur Moschorum & Cosaccorum arma. Denique jam redierunt eo res Polonicæ, ut nisi armis in Suedorum ditionem redigantur, succubiturum illud Regnum omne sit feritæ Moschorum, Cosaccorum, Tatarorum, Turcarumque: quod paulo post liquebit. Quum itaque jam dudum Poloni in sese dederint Suecis justam belli copiam, nec à mora ulteriore ullum malis remedium, sed pericula maxima utrique parti (nam & Suedici Regni summo cum dispendio fuerit coniuncta Moschorum Tatarorumque de Polonis victoria) certo immineant, non pium amplius, nec prudens fuisset, & pericula & iniurias justorum armorum abstinencia alere.

Nisi vehementer fallor, Amice, satis iam feci primæ dubitationi tuæ.

ALTERAM itidem nunc, paucis tamen, expediemus. Et quidem demonstrabimus primo, *republicam Poloniam non fuisse Moschis Cosaccisque parem, sed certo fuisse succubituram, atque ita futurum fuisse; ut latus illud Germania populis istis barbaris detegeretur*: deinde vero, *novis viribus prudentique Suecorum administratione, ita suffulciri Poloniam posse, ut Germania ab isthoc periculo sit libera.*

Prius illud palam est, vel ex iis quæ hoc proximo quinquennio contigerunt. Quantos enim progressus fecit Cz ar Moschorum brevi tempore per Lithuaniam & Russiam Polonicam! Quam invalidam & levem manum tantæ multitudini tantoque robori obiecit Polonus! Quanta porro sunt multitudo pariter & præliandi promptitudine rebelles Cosacki, & qui cum iis conspiravere agrestes Russi! Quantillum est quod Poloni opposuere! Quamve omnia infeli-

citer successerunt! Nonne per est verisimile, nisi Suecavis & auctoritas intercessisset, futurum fuisse, ut vel hæc hyems proxima Germaniæ finibus Tataros, Moschos, & Cosaccos miscuisset? Nec vero est quod expectare meliora à Polonis potuerimus; quæ illorum fuit corrupta respublica.

Lustra fodes, mi Nicanor, militiam Polonicam. Nulla illi populo auxilia ab ulla Christiana gente. In Tataris spes fuit reip. posita: hoc est in iis qui in speciem amici, ast infidi incertique, & sub ipsa amicitiae specie sævi sunt regionis vastatores, in universum Christianæ hostes fidei & Polonorum veteres inimici, soli prædæ intenti.

Iam cum miles sit alius delectus aut evocatus, alius mercenarius, uterque sive pedestris sive equestris, & quidem aut peregrinus aut patrius: non equidē nega vero, olim magnum robur fuisse evocati equitis Polonici; confusus illis quæ Samoscius in Gallia jactavit, *Polonia Regem cum bellum illatum propulsandum sineq. defendendi sunt, nulla impensa facta, supra centum millia hominum armare; quanquam vehementer laboret annalium Polonicorum fides apud quam multos, dum præclara nobilis illius militiæ facinora narrant ad posteror. At vero iamdudum in illo quidem Polonico equite ostentationis & inanis famæ plus fuit quam solidi præsidii. Ne quidem ipsi Poloni, gentis suæ haud parci laudatores, vitium hoc manifestissimū ausi fuerunt dissimulare. Vnum pro multis nunc tibi producam testem, gente Polonum, Simonem Starovolscium, doctum & eloquentem scriptorem libelli cui Poloniæ nomen est. Is diserte suo loco differens de Regni viribus, cum multum jactasset nobilem Polonicum equitatum, addit: *Sed in ista multitudine duo desiderantur quæ in bellis gerendis maxime sunt nociva, celeritas nimirum & abedientia. Quia & tarde nobiles sub signa conveniunt: comitiis**

primo.

primo tot hebdomades celebratis, sine quibus bellum edici non potest: & difficulter ab æconomia sua uxoribus atq. liberis divelluntur: usq. tertium edictum expeditionis bellica prava consuetudine expectantes. Cumq. jam ad locum designatum convenerint, tum se unitos & armatos animadvertentes, aut contra Regem aut contra Senatum tumultuantur. Vel etiam interdum Reges ipsi tardius in expeditionem procedunt & mora tempus elabi ultro patiuntur: ne vel à nobilitate ob malum regimen exagitentur, vel prætensionem eorum cum diminutione suorum reddituum aliquid tribuant. Vnde incommoda ista Respubl. prospiciens, stipendiario milite ordinariæ bella peragere consuevit, generalem autem nobilitatis expeditionem, in ultimum tantum casum reservavit, ut, si vel tributa non sufficerent, vel hostis ita potens esset, ut ei resistere conscripto milite Generalis belli nequireret, tum ad generalem omnium nobilium expeditionem, tanquam ad ultimum remedium confugiendum putarent. Idem Starovolscius paulo post: Quo autem in ejusmodi expeditiones paratior nobilitas fieret, statutum est jamdudum publico Comitiorum decreto, ut prima post Paschatis festum Dominica, in singulis sarrapiis lustratio in armis fieret, & quisque Palatinus suorum provincialium nomina in tabulas referret. Quod, eque ut & alia instituta patriæ, aut penitus negligitur, aut certe neglectim peragitur, pœna in delinquentes valde levi assignata. Accedit porro, quod illa nobilium multitudo evocata, licet velit, non possit tamen unum in corpus coire, propterea quod præfidiario milite pene ubivis sit destituta Polonia, ut & circa fines commodis arcibus contra subitas incursiones paratis. Fatetur etiam hoc Starovolscius hisce verbis: Illa ingens nobilium equitum multitudo ob malum reipubl. regimen nullatenus simul convenire contra hostem potest: nam aliter nudarentur provincia conterminæ potentibus vicinis, quas utique custodire oportet, cum militem in urbibus præfidiarium nullibi omnino habeamus, qui impetum supervenientis

D 3. hostis

hostis aliquomodo reprimere possit, præter paucas cohortes in Russia qua excubant. Vide mihi jam quæso decantatum illud robur nobilis equitatus Polonici quam sit invalidum: & tamen hoc & debebat esse & olim fuit dextera quasi manus Regni illius.

Instituerat olim & peditem evocatum, prudente consilio, Rex Sigismundus Augustus. Audi vero & de illo Starovolscium. Pedestris quoque militia Augusti Regis invento, tam ex urbana quam è pagana plebe delecta, fere jam evanuit: & vix aliquot centena jam numerantur, eaque nullius frugis, qui quindecim millia superare debuerunt. Reliqui omnes, avaritia præsidium, censum exsolvere jussi & rusticanis laboribus adscripti cingulum militare deposuerunt. Laudo quod ille subjungit consilium, de juventute deligenda etiam ex agresti plebe in pedestrem militiam: neque dubito fore id utilissimum. At observo heic, non quid fieri possit aut debuerit, sed quemadmodum sese nunc adeo habeat militia Polonica. Et vero unice meretur annotari, illarum Russiae partium plebem, quæ Starovolscio iudice ad delectum omnium aptissima, multis injuriis irritatam, correptis armis aliquot jam annos oppugnare rempubl. Polonicam, ita ut hanc hodie experiatur acerrimum hostem. Sed & in universum de illo peditum Ordine habemus fatentem Starovolscium illum. Pedites paucos habemus, (inquit,) eosque è plebe omnes, non ita ad pugnam quam ad labores castrenses evocatos: ut nimirum fossas dum opus fadiant, vallum excitent, pontes construant, vias sternant, tormenta & impedimenta bellica conducant, atque demum castra ipsa custodiant. Quod si vero oppugnationem loci alicujus meditamur, tum è Germania aut Ungaria mercenarios nobis pedites adducimus, qui sunt exercitatiores nostris.

Saltem itaque in evocato milite domestico nihil est præsidij

præsidij reipubl. Polonicæ. Specta fodes jam & conductitium. Equite vix alio utuntur Poloni, etiam mercenario, quam ex nobilitate patria conscripto, quem quod parte quarta regionum proventum in stipendium fruatur, ex instituto Regis Sigismundi Augusti, Quartianos appellant. Solet sane ille fortem satis sese ostendere. At vero simul disciplinam non audit, & si recte rem æstimes plus ferociæ habet inconsultæ, quam constantis fortitudinis. Sed & illorum ferocium parva admodum manus est: alij magis lingua quam pectore valent, & ut primo impetu animosi, ita repressi leviter statim languent atque à fuga præcipite quærunt subsidium. Multus quidem est in his laudandis Starovolscius: at si ex vero æstimes illius narratiunculas, apparebit, vehementer illum errare, dum soli illi equitatu adscribit facinora, quorum laudem maximam admistus pedes meruit.

Nec ego nec tu illis rebus intersuimus, Nicanor: provocare tamen non dubito ad ipsas Polonorum historias, quæ neutiquam profecto Starovolscio consentiunt.

Majus hætenus robur & præsidium rebus suis invenit Polonia, in illo peditæ gentis suæ mercenario Cosaccorum Zaporovianorum. Et vero ex quo hanc militiam in ordinem & leges redegit Stephanus Rex, munimentum ille regni fere unicum fuit adversus Scythicas præcipue incursiones, nunquam pene non metuendas, & vim Turcarum. Verum hoc olim fuit. Nunc quantum mutavit! Rebus gestis, & numero, & remotiore à regia loco, ipso denique solo suo & coelo, cum non in tempore cavissent Poloni, in eam magnitudinem miles ille sensim excreverat, ut coercentium morderet frena; ac proinde prudenter ita erat tractandus, ut non advertenti (ἐν προπύργῳ τῷ τοῦ θεῶν iubent sapientissimi Græcorum) subtrahere quidem inolefcenti facultate

facultate, in amore tamen & reverentia Polonica reipublicæ perseveraret. Poloni vero primum Cosaccos injuriis irritare, inde arma in eos vertere, omnem militem illum pene exauctorare, nec ita quidem ab injuriis abstinere. Vnde tandem Bogdano Chmielnicio duce, acerrimum illud belli incendium ortum, quo septem jam annos Polonia universa tantum non conflagravit.

Multis injuriis læsos Cosaccos, ne quidem prudentiores Poloni ipsi dissimulant. De illis inter multa alia hæc sunt verba Stanislai Lubiencki Episcopi Plocensis in Censura Laureæ Austriacæ Julii Belli: *Ceterum quadraginta proximis istis annis, numero & fortunis quas ex Asiaticis pradis corradiunt aucti, prædia quoque & domicilia in oppidiis Regiis & Nobilium habere cæperunt: quibus & uxores & res pretiosiores deponerent. Cumque locorum domini & Regii præfecti eos censu ac tributis gravarent, & quasi in servitutem redigere vellent, sæpe illis rebellarunt. Ita orto ex libidine & cupiditate privatarum dissidio, aliquoties eos publicis armis & impensis coercere opus fuit. Consule vero, Nicanor, & Piafecium. Ille narrabit, jam anno 32, defuncto Sigismundo, tempore interregni, cum alia tum religionis Græcæ salvas immunitates sibi petiisse Cosaccos à Regni Ordinibus, nihil tamen aliud accepisse responsi, quam cura sibi futuras religionis Græcæ rationes. Pristinæ scilicet & avitæ Græcæ religionis cui assueverant, loco per vim invitis Sigismundus curaverat obtrudi, ut & aliis Ruthenis, ritus Latinos aut certe illos per Unionem cum Romano Pontifice institutam, Papali cultu interpolatos. Quæ intolerabilis est animorum servitus. Ejusdem Piafecii hæc sunt verba pag. 494. Hoc anno, (1637) licet fortuna exituque tristiore, Cosacki pro retinendis libertatibus suis laborarunt. Cum enim diversi proceres Regni Polonia, in ditionibus Kijoviensibus, Cosaccorum præcipuis sedibus, multas possessiones*

possessiones partim emptione partim liberalitate Regis acquisivissent, census earum ut auferrent, licentiam Cosackorum quæ tali ipsorum proposito obstare videbatur, refrenari oportere, apud Regem Senatuzq; predicabant. Narrat mox prolixius, quemadmodum post acerrimum conflictum, victis Cosaccis, dux eorum Paulucus cum quatuor aliis antesignanis post acceptam fidem deditione sint capti. Idem pag. 501 multis persequitur, contra datam fidem ducem Paulucum cum suis capite plexum: & publico Comitiorum decreto, omnes immunitates una cum oppido Tschitimirov Cosaccorum societati concessas à Regibus Polonia, fuisse abrogatas, negotio dato præfectis bellicis, ut nova expeditione suscepta, comitiorum illi decreto resistentes extirparent. Cum deinceps retulisset, belli illius adversus Cosaccos initi variam fortunam, Cosaccosq; deditionem tandem fecisse accepta securitate, fore ut in proximis comitiis pristina libertates ipsis restituerentur, addit solutis castris cum diffuerent manipulatim ad propria, plurimos eorum à milite regio trucidatos, privilegia ipsorum in ambiguis Comitiorum deliberationibus mansisse; quodque magis, (inquit) tribunus seu commissarius illis à Rege nunc unus nunc alter datus stipendia ipsis defraudabat, serviliterque eos tractando, non nisi quæstum querebat ex illorum obsequio. Fatetur idem Piafecius pag. 508 Bogdanum Chmielnicki, ob injuriam atrociorē acceptam à præfecto domicilii sui Gursumi, redditum insolentiorē, imprudentia vero ducum Polonicorum omnem Cosaccorum sentinam, jam exacerbatorum acceptis diversis à præfectis locorum injuriis, tum & à tribunis seu commissariis apud eos regiis, quasi stipendia ipsis retardarent, & eorum obsequio ad suos quæstus abuterentur, ad seditionem provocatam esse. Hæc omnia Piafecius non dubitavit ad posteritatem referre. Sicut ingenua etiam ejus confessio extat pag. 509 de plebe Russica, quæ eodem cum Cosaccis tempore, anno nimirum

1648, arma corripuit: illam nimirum cum esset Græci schismatis, pertinacius infensam ritui Latino, dominisq; suis, Vnicne ut vocant istos ritus confundentibus, & quod ab ea colonaria (quia plerumq; ibi Nobiles, fundos suos locant Judæis, insatiabili avaritia augendis possessionum censibus affucti) immensa extorqueant.

Sed non est quare de causis motuum Cosaccicorum hoc loco differam. Satis est si observes, Nicanor, ab illo milite nihil expectari hodie posse præsidij adversus Moschos quidem. Et vero eorum utrique ritus sacros Græcos colunt; jamq; adeo Cosacci in ditionem pene Magni Moschorum Ducis concesserunt: non adeo pridem fœdere cum Tataris pacto Polonos aggressi sunt. Certe jam septem annos integros infensissimum reipubl. suæ hostem experta Polonia est Cosaccos suos; suntque illi hodie Moschorum Duci sacramento adstricti, tantum abest ut ingruentibus Moschis sese sint opposituri.

Superest unus miles externus. Et vero illo solet uti Polonia ex Hungaris, præcipue tamen ex Germanis conducto. At vero hætenus quidem nunquam ille ad insignem numerum excrevit. Nec Germani nostri signa Polonica amant, quod durius plerumq; habeantur & iniquius ab insolente Polonico equite. Ne quid nunc dicam de illo odio, quo plerique Poloni in gentem omnem Germanicam feruntur. Certe nec Poloni nisi ægris oculis Germanum militem vident, nec Germani Polonum fidum sibi solent experiri. Ut vero aliquid reipubl. Polonicæ opis sit positum in illo milite externo: quantillum, amabo, illud est! Quam impar sane Moscho, Tataro, Cosaccis! Et vero in universum miseram illam reipubl. cujus robur est in milite peregrino collocatum!

Expende porro, Nicanor, quam etiam reliqua sine quibus bellum non geritur aut miles officiū non facit, fuerint apud

apud Polonos non satis idonea ijs immanibus hostibus repellendis. Audi vero, sodes, ante omnia communem aliquam de ijs omnibus Starovolscij confessionem. Cum ad potentiam, ait, & firmitatem cujusq; status requiratur numerositas virorum bellicosorum, abundantia comitamentorum; pecuniarum magnitudo, armorum sufficientia, & frequentia munitionum: nullum prorsus ex prædictis conditionibus debite & convenienter habemus. Hæc ille prudenter simul & ingenuè. Audivisti jam tum ejusdem æque ingenuam confessionem de milite ipso: & à nobis ille oculis tuis modo est exhibitus. De singulis reliquis in promptu est adferre itidem plurima: ne molestus sim tamen, non nisi uno illo Starovolscio teste nunc utar.

Hujus hæc sunt verba: De comitamentis non est dubitandum, quin tantam in bellis multitudinem Rex Polonia alere possit: cum sit cuiq; manifestum, Regnum Polonia posse alia duo similia regna, prout ipsum est, non modo frugibus sed & carnibus & allio campanatico sustentare. Nihilominus nos Poloni in qualibet expeditione bellica fame laboramus: atq; sapissime res jamjam ad finem perductas, propter comitamentorum penuriam, turpiter deserimus. Quod totum procedit ex socordia præfectorum belli, aut potius Reipubl. Ordinum, qui dum aliquorsum bellum edicunt, nusquam in partibus illis de comitamentis provident, sed quod cuique militi fors offert, id rapit in transitu; & postea sese cum equis & famulis in castris sustentat. Fame vero oborta, aut morbis passim omnes intereunt, aut nolunt obedire ducibus suis, & dilabuntur. Quod si vero Respubl. primum ibi de comitamentis provideret, quo exercitum mittere vellet, & comitamentis ille, ob abundantiam rerum omnium, parvo certe constaret, & expeditionem propositam facile ad finem optatum deduceret.

Pergit idem Starovolscius: Jam autem quoad pecuniam, parata illa in arario nusquam reperitur, sed tum demum, cum bellum

bellum per Comitia edicatur, provincialibus imponitur, vectigaliaque diversa bello finiundo sufficiētia statuuntur. Sed & hæc ipsa, vel tarda conferuntur, vel non ex integro in ararium inferuntur, potior pars privatorum cupiditati cedit. Quæ si paulo ordinarius colligerentur, atque etiam tum, cum bellum nobis nullum est, moderate imponerentur, & asservarentur in promptuariis: profecto & exercitus nostros celerius in hostes educeremus, & militem ipsum obsequentia in bellis haberemus: qui dum avaritia gubernantium stipendia sibi retineri vident, facile in perniciem patriæ conjurant, quod jam sapissime sumus experti. Hæc de pecunia publica ille. Debuisset autem merito addere, pecuniæ exiguam vim polle contrahi, quoniam Episcopi & Religiosi nihil de suis bonis in publicum conferunt, cum tamen habeant opes longe maximas, multo certe majores opibus Nobilium, Regijs proventibus pene suppare. Quo nihil est indignius.

Sed audiamus porro Staravolscium. *Arma quisque sibi privatus curat à Germania, aut aliqua alia gente vicina porzari: quia Rex aut Respubl. nullum armamentarium publicum habet. Sunt tamen aliquot in locis repositoria tormentorum majorum nuperrime à Serenissimo Rege Vladislao IV instituta: sed plura multo & ordinatiora civitates habent, utemq. nobiles nonnulli & principes Regni.*

Postremum & hæc addit: *Quantum ad munitiones & fortalitia, candide fatendum est, illa omnino in Polonia nulla existere, præter aliquot castella privatorum; idq. sparsim per provincias & Regnum, ut est Zamoscium, Lanczum, Zbarasium, Nesuizia, Lachovicia, Medirecia, Dulona, aliæq. minutiones papulationes. Hæc Staravolscius. Vult quidem idem ille: propugnaculis non esse opus, quod Poloni sua facile vel pectoribus suis tueri possint: prout hætenus tutati sint, aperto potius Marte cum hoste decertando, quam vel stratagematis utendo vel*

do vel propugnaculis sese includendo. Verum hæc quidem persuasio æque est inanis atque illa veterum Laconum: quam proinde sapiens vir Aristoteles in opere Politico & nimix ruditatis nomine traducit & præclaris rationibus convellit. Et vero, ceu ille quoque dicebat, errorem stultum res ipsa convincunt, & consensus omnium gentium prudentiorum veteris pariter nostrique ævi. Nec profecto quod aperto Marte hætenus tuta fuerit Polonia, etiam impostero par fortuna speranda. Imo sperari illa non potest, postquam virtus prisca militaris multum adeo mutavit, & potissimum militem suum Polonia hodie experiatur hostem. Certe cum Poloniam natura ipsa vel mari, vel fluvij, (Borysthenem excipio: sed illum jam tum suum fecit Moschus) vel sylvis aut paludibus inaccessis nequiquam muniverit, & ab arte nihil accesserit prædij, præ omnibus Europæ rebus publicis Polonia virium imbecillitate laborat.

Quum in hunc modum vero omnis res militaris Polonica sese habeat, cui non patet, imparem esse Poloniam repellendis vel solis Moschis; præsertim postquam non tantum Russica plebs Poloniæ, verum etiam Cosacci ipsi in Czaris imperium transierunt?

Neque vero est quod cogitemus tempora prisca, aut veterum Polonorum in Moschis domandis felicitatem. Plurimum enim decrevit vis Polonica intra paucos annos, præsertim ex quo Zaporovianus miles plebe Russica stipatus Polonos deseruit, quod jam sæpius monuimus. Ex adverso longe melior hodie est ratio Moschicæ militiæ quam fuit olim. Vtpote quum Germanico more signa sequi, ordinem servare, audire disciplinam & quidem subducibus Germanis exerit. Quodque maximum est, hodie sub imperatore est miles ille, juvene belli avido, omni-

bus domi p̄catis: quum paulo ante à domino ignāvō,
& rebus domi vel corruptis vel certe post diuturnum ci-
vile bellum fessis, haberetur. Nec enim nunc repetam,
quanta Moschorum viribus facta sit accessio per Cosaccos
& agrestem Russorum Poloniae manum.

Non est etiam quod existines, potuisse Polonos resti-
tuere in integrum res suas. *Primo* enim ea utique vis fuit
Moschica, isque irruentis mali impetus, ut nisi parato
jam & constituto remedio reipubl. interitus haud potue-
rit averti. In omni mora periculum fuit: dumque deli-
berassent Poloni de componenda rectius republ. jam
periissent, & in finibus Germaniae jam hæssisset Moschus.

Is deinde fuit status reipubl. Polonicae, ut nec vitia
sua ferre amplius potuerit nec domesticam medicinam
admittere. Consultationibus publicis comitiorum quid
potuit esse magis confusum, factiosum, & turbulentum?
Parum abest quin Græcum illud de ijs affirmare licuerit:
ἡδεῖς ἑδωκὲς ἀνὰ τὴν ἑσπέρην. Quid magis perniciosum reipubl.
quam paucorum Nunciorum terrestrium, quos vocant,
obnunciatione, integra Regni comitia reddi interdum
irrita? Quanto in vilipendio fuit Regia auctoritas? Quid
Regibus tandem reliquum mansit præter tenuem splen-
dorem? Non disputabo nunc, quibus de causis & per quos
ingentem illam jacturam fecerit Regia majestas. Scio
enim & à Regibus ipsis illam præcipitatam, & à Regni Or-
dinibus sensim esse subrutam. At profecto ea est populi
illius indoles, ut etsi ferre nequeat dominatum integrum,
nequeat tamen etiam ferre integram libertatem, ac pro-
inde nisi Regis dignitate salva ipse salvus esse non possit.
Iam cum antehac magistratus sacri pariter profanique
libera Regum prudentia constituerentur; quantis factio-
nibus, quantis tumultibus, res sancta & reipubl. summe
necessa-

necessaria jam annos aliquot cepit involvi! Dixeris nihil
perinde rempubl. aliquamdiu turbasse. Ipsa summa judi-
cia laborasse, ut ita loquar, lethali ter, querela publica
omnium fuit. Ipsemet Staravolscius non dubitavit inter
causas felicium armorum Gustavi Adolphi Regis in Po-
lonos referre, *iram Numinis, ob tot scelera publica impunita.*

Porro in omni populo Polonico credin' fuisse qui
serio optarint reipubl. statum qui erat integrum? Mihi vix
videtur. *Primum* enim utique religionis obtentu inter
se se hostili prope fuerunt Poloni animo, ex quo Sigismun-
di Regis cura Iesuitæ in Regno illo invaluerunt. Iam à
multis seculis scilicet Ruthenica gens, quæ aut Poloniae
Regibus aut Magnis Lithuaniae Ducibus subest, Græcos
ritus sensusque amplexa est, multum à Romanis diversos,
quibus populus reliquus fuit additus. At semper inter
illos pacata omnia: nec sacrorum diversitas reipubl. civi-
lis communis studium turbavit. Posteaquam Romanus
cultus avorum memoria passim terrarum ab erroribus
superstitiosis purgatus est, in Polonia quoque numerosa
satis multitudo novis illis partibus accessit: non sine ali-
quo motu quidem, qui tamen intra modum fuit, nec ali-
quod animorum divortium induxit. Simul vero Sigis-
mundus Rex Iesuitarum consilio & opera sacra profana-
que omnia cepit regere; jam omnia turbari, solis Roma-
næ superstitionis affectis honores dignitatesque vindicari,
diversa sentientes convitijs & contumelijs affici, in eos
tanquam hæreticos extrema meritos omnem reliquum
populum incendi, omnes urbes Iesuitarum collegijs alli-
endiæ juventuti idoneis repleti, misero denique Ruthe-
norum populo atque adeo & Zaporovianis Cosaccis Ro-
manensia illa per vim obtrudi. Vnde ita in partes scissus
est populus, ut jam ipsimet reipubl. suæ indignentur partes
quæq;

Quæq; Romanenses enim illi, etsi numero & dignitate reli-
quis prævaleant, accensi indocto zelo, cum injuria con-
junctum existimant quod supersint qui sentiant aliter,
præsentē felicitate sua neutiquam contenti. Reliqui do-
lent, deprimi se & honoribus debitis privari tantum ob
innocuos sensus. Multo maxime fremunt Rutheni vim
passi. Nulla harum partium igitur amare potuit præsen-
tem reipubl. statum, quippe quum nulla non de injuria
conquesta sit, quam ex publico statu acceperit.

Lege, sodes, Nicanor, quæ ipsemet Piasecius narrat de
Iesuitarum quidem auctoritate apud Sigismundum pag.
300: quemadmodum illi Iesuitæ innumeris contentio-
nibus urbem Rigam ad desperationem adegerint pag.
347: de turbis ex Vnione quorundam Russicorum anti-
stitum cum Papa Romano facta exortis, pag. 139. & 444. &
459. Quo ultimo loco ut & pag. 445. 448. 456. 458 simul
disces, Evangelicorum tolerantia, sacramentis Regijs du-
dum confirmata, quam sese opposuerint in illo post Sigis-
mundum interregno optimatum Regni primores, quod-
que illam non admiserint Præsules, nisi addita illa clausula:
salvis juribus Ecclesie Catholica Romana: quæ quid sibi velit
nemini est occultum. Indico duntaxat tibi loca, quæ
possis consulere si libet: nec enim mei est instituti hæc
omnia plene narrare. Staravolscius non dubitavit affir-
mare, eo rem rediisse, *ut nemo in Senatum admitti, aut ad mi-
nora subsellia vocari quisquam potuerit, nisi Romana professionis.*
Kobierzyckius vero, quo loco in defuncti Sigismundi lau-
des se diffundit, *l. i. Vladislai Principis*, hisce verbis utitur:
Constantissimum materna pietatis cultorem habuit Polonia:
quam serpente hæreseos contagione leni ac efficace (efficace
fane apud ambitiosos, at iniqua & communi omnium li-
bertati adversa) *medicina ad veteris orthodoxæ religionis re-*
vocavit

vocavit sensum, cum præfecturas & magistratus deferret viri
avita majorumq; fidei apprimè tenacibus: eoque dominationis arcano
(fuit sane arcanum dominationis, utpote cum hoc ipso
unam eamq; majorem partem procerū zelotarum sibi Rex
plurimum devinxerit, exiguo tamen commodo) *retento,*
hæreses absq; ullo strepitu partim suppresseret, partim memorandæ
pietatis exemplo ad pristinum reduceret statum. Et qui potissimam
præcipuamq; Senatus partem novo ac recenti addictam dogmati
in primordiis regnorum repererat, decedens duos tantum relin-
queret, Sigismundum Grudzinium Calisiensem, & Raphaëlem
Leczynium Belzensem Palatinos, illum quidem occultiori cuidam
sectæ deditum, proindeq; minus noxium; hunc Calvinī sequacem,
summa nihilominus probitatis civem patriæq; studentem, com-
modis.

Pecco forte, Nicanor, quod probare instituiam testi-
monijs illa, quæ omnibus Polonicarum rerum gnaris
sunt notissima. Utile tamen duxi saltem pauca hæc ad-
ferre in medium, quo omnis dubitatio tuo animo exi-
matur, quoniam haud facile soles credere (quæ tui est
ingenij probitas) sequiori famæ etsi vulgatissimæ.

Non vero illa tantum ratione dissecta est in partes
Polonia, *verum* etiam in universum inter ipsos Equites
& Prælatos, quos penes cæteroquin summa est reipubl.
pessime convenit. Capita contentionum (sunt autem
ponderis haud exigui) legere licet apud Piasecium pag.
444. Neque Equitum causæ justissimæ à reipubl. ullum
potest esse remedium, quum clerus curiæ Papalis favore
se tueatur. Et tamen nemo prudens non videt, illa quæ
Episcopi arrogant sibi jura, non posse salva republica ad-
mitti.

Quis crediderit porro, populum omnem ingenuum
F reliquum

reliquum amasse illam rempublicam, quæ sese exclusit ab honoribus adeundis? Non sane firmo est loco civitas quæ pluresque habet inhonoratos.

Longe vero iniquior est conditio plebis Polonica: quia durissima premitur servitute. Ceu jam supra audivimus, plebem agrestem Ruthenorum, ob summas injurias, in ipsos dominos suos arma corripuisse. Multo minus ergo plebs potuit præsentem reipubl. statum amare.

Taceo alias privatas lites, quibus Polonia hodie est refertissima, ipsomet teste Staravolscio: quoniam minus quam reliqua dissidia in publicum nocent. Etiam illa tamen animos ab amore publici status multum avertunt. Nihil etiam dicam de immani luxu pariter & luxuria, quibus ditissima patrimonia brevi absorbentur, & qui ad egestatem sunt redacti ad res novas incitantur. Non tangam quoque illam superbiam: qua factum, ut alios tantum non omnes præ se contempserint, cum primis ipsos hostes suos. *Minimi sese semper fecisse Suecos, ultro fatetur Staravolscius. Silebo denique illam ditescendi cupiditatem, quæ aliquamdiu inter Polonos præter solitum exarsit. Prudenter tamen Staravolscius fatetur, illa cupiditate hoc effectum, ut minus publicis rebus modo sint intenti Poloni, & quisque eorum privato commodo studeat: ex quo procerum assidua discordia, nobilium inobedientia, aula suspiciones, Principis contemptus, rerum neglectus passim.*

Non possum vero non tibi considerandum exponere immodicum illud libertatis studium, quæ lue laborat universa Nobilitas Polonica. Nec enim illa veram libertatem denique cupiit, sed in licentiam effusa nec leges amplius nec Regis aut magistratuum jussa audit: unoquoque plenum suarum rerum arbitrium affectante. Hoc enim

enim est evertere penitus rempublicam & convellere omnem societatem civilem. Certe hisce moribus rempublicam tueri salvam, unum est eorum quæ sunt impossibilia. Nec vero est quod sperare meliora quem jubent tempora mollia, quæ interdum hisce vitijs laborantes respublicas aliquamdiu sustentant. Simul enim vel domi vel foris gravior aliquis motus exoritur, respublicæ ejusmodi illico collabascunt. Perinde atque domus aliqua aut navis lacera cælo benigno quidem superest & mentitur aliquod robur, tempestati tamen mox succumbit.

Atqui tantis morbis laborantem Poloniam invasit immani multitudine Moschus. Quî potuisset itaque non illa tota in tam potentis hostis ditionem pervenire? Et vero pene omnem Lithuaniam, & Russiæ Polonica plæraque, inusitata armorum felicitate, spacio temporis perexiguo Moschus jam subegit. Nec potuerunt Poloni dissimulare suam imbecillitatem, maximum ruentibus suis rebus præsidium à Tataro, capitali gentis hoste, expectando.

Jam ante ostendi, in tanto discrimine & tam præsentē, rempublicam suam non potuisse Polonos ita emendare ut esset par tuendis reliquis. Non obscurum vero est etiam ex ijs quæ in medium attuli: etiam si tempus hoc admisisset correctionem; mores tamen eos esse, eoque rediisse Polonica omnia, ut nisi vi adhibita respublica quo par est modo componi haud potuerit. Numquid enim cui fiat verisimile, homines illis moribus & institutis non tinctos, non imbutos, sed plane immerfos, innutritosque, sponte sua, boni publici causâ, mutatuos illa sibi adeo accepta, laudata, usitata? Alienum est hoc ab omni humano ingenio. Et vero quis illis persuadat

suadeat, saltem improbum esse illud libertatis studium quo ducuntur? Utque multis hoc persuadeas, cum paucissimi quid expediat publice, præ inani cupiditate privata rei, intelligant, saltem apud plurimos doctrina sola nihil effeceris. Sed & qui intelligunt bona malaque, tamen raro ea sunt virtute, ut quæ intelligunt sectentur.

Viergo quadam opus omnino fuit reipubl. Polonicæ: si corrigi debuit. Vi, inquam. Nec vero tales rerum publ. morbos nisi visanaveris. Certe ut corporis ita & reipublicæ mala quædam ferrum & ignem exigunt: molli aut lenta medicina exasperantur augescuntque.

Cæterum nec domi (in ipsa inquam Polonia) partis alicujus, fuit vis par illi carcinomati edomando. Non Regis sane, non alicujus Nobilium ordinis illa fuit potentia. Utq; fuisset; attamen num pars victrix fuisset omnia ex usu publico compositura, per. profecto est incertum. Ut sequiora quæque suspicemur, movent nos plætorumque mores efferi.

Quicquid hujus sit, non potuisse amplius Polonos Moschorum potentia resistere, ac proinde futurum brevi fuisse, ut omne illud Germaniæ: latus barbaræ Moschorum tyrannidi & Tatarorum incurfibus nudaretur, haud dubie, perspecta penitus Polonorum republ. etiam tu, Nicanor, jam confiteberis. Cave, vero, dubites, Suecorum consilio & viribus imposterum ab illo quidem immenso periculo nos tutos fore. Favet illorum conatibus altissimum Numen: ceu palam est. Præst Rex, pietate non fucata, prudentia, dexteritate agendarum rerum, animi generositate & fortitudine, vigilantia, modestia, benignitate, clementia, nemine eorum quos hic sol vidit rebus magnis gerendis pares, secundus. Huic ad ma-

ad manum Senatus fidelis, gnavus, cautus; exercitus bel-
landi vetus, obsequens, numero magnus, virtute maxi-
mus, semper victor, nunquam victus. Abunde est pru-
dentia ad componendam feliciter rem Poloniæ: abunde
potentia ad improbos & refractarios coercendos. Quanto
magis junctis Sueciæ viribus idonea imposterum erit Po-
lonia, procul abigendis Moschis, Tataris, alijsq; barbaris!
Non sine causa profecto jam tum Constantinopoli trepi-
datur ad hanc potentiam. Certe non major fuit Alexan-
dri vis, qua Persis superatis omnem Asiam domuit. Et
ex illis ad Pontum locis Gothi quondam Macedoniam,
Græciam, & Asiam populati sunt.

Legi quidem nuperrimi Polonorum Legati Christo-
phori Przimski orationem, ad Regem Carolum Gusta-
vum habitam: qua tumidus orator ille etiam hoc per-
suadere voluit, non posse feliciter Poloniam cum Sue-
cia conjungi, quod *distinctissima sint regna: divisse naturam
mari: dissociasse constitutionem imperij. & religionem: discre-
pare legibus, moribus, habitu, lingua: in nullo sibi populos hosce
esse similes nisi ferocia discordiarum omnium fomite.* Non po-
tui verò non ridere hæc à Polono eoque Casimiri Regis
Legato, dici: quum tamen jam sexaginta prope annos per-
petuos Polonorum Reges affectaverint in Suecos impe-
rium, & Polonici Regni Proceres Regum suorum illa de-
sideria consilio, ære, milite juverint: imo cum in suam
republicam receperint Poloni ipsi olim, & Russos insti-
tutis sacris pariter profanisque, multum alienos, & Borus-
fos Livonosq; lingua & moribus semper, hodie etiam
religione diversos, & Lituanos denique cum adhuc foeda
barbarie & paganismo essent collutulati.

Distinctiones ejusmodi obstare constituendæ reipu-

blicæ alicui absolutissimæ omnibusque numeris perfectæ,
fateor. At illam ut voto optare licet, ita assequi non
licet. Platonice civitatis ea felicitas fuerit. De illa con-
denda nulla hodie deliberatio est. Gentes non minus
atque Poloni sunt & Sueci, mari divisas & institutis dif-
ferentes, in unum reipubl. corpus sic satis feliciter posse
concrefcere, jam à plurimis seculis inter omnes homines
usu compertum est. Ad linguam moresque alienos ad-
discendos ipsi Poloni longe sunt aptissimi. Non dubita-
vit sane eorum ingenium hoc nomine commendare
ipsemet Starovolscius: *quod non solum ad convictum atque
familiaritatem quorumlibet faciles, verum etiam ad mores &
imitationem eorum cum quibus vivunt, externorum præsertim,
sint flexibiles; quod item libenter peregrinentur, & earum gen-
tium linguas ad quas perveniunt cupide & facile addiscant.*
Non sane vel in medio Latio tam multos reperiri cum quibus
Latine possis loqui (quod idem dicit) verissima Poloniæ laus
est. Vt mores aut habitus aut leges omnium iidem sint,
non est necessum in republica, qualem constituere vul-
go solemus. Satis ergo fuerit; si imposterum uterque
populus conveniat in legibus, quæ utriusque salutem
bonumque commune attinent. Nec ea est ferocia Sue-
corum (quod Prsimsky forte existimat) quæ Polonum
non ferat. Germanicus genti animus est: qualem in
Prussis & Livonibus Poloni utique non sunt averfati.
Ne Polonorum quidem ea ferocia fuit, ut non ultro sibi
expetierint Regem olim quidem Lithuanum Jagellonem,
non adeo pridem Henricum Vallesium Gallum, Stepha-
num Bathorium Hungarum, Sigismundum Suecum: imo
non passi sint per aliquot centum annos Germaniæ no-
stræ Reges sibi dominari. Quod si quorundam major
hodie

hodie est ferocia, cogitemus vetus illud:

Nemo adeo ferus est qui non mitescere possit.

Non desunt remedia compescendæ ferociæ, & mitigandis
superbis pectoribus.

Maximum concordie statuminandæ obstaculum vi-
detur fore Papalem religionem, qua plerorumque proce-
rum aliorumque animi fascinati sunt. At vero jam au-
divisti, Nicanor, plurimis seculis, Russos Græcis sacris ad-
dictos cum Polonis Latinorum rituum asseclis pacate
in unam rempubl. coaluisse: inter eosdem porro Polo-
nos & Protestantes sic satis bene convenisse: donec Iesuita-
rum magisterio in odium omnium dissidentium multi Po-
lonorum incensi sunt. Non diffiteor, manente illo amaro
zelo, sinceram aliquam animorum unionem haud sperari
posse. Potest vero & ille in concordiam paulatim temperari
modo non uno, tantum si removeantur è medio illi in-
cendiarii. Nec vero fortassis fiet hoc invitis multum
Polonis ipsis: utpote quum jam ante hos quadraginta
annos idem agitaverint procerum complures, quod li-
bri tunc editi docent: & *annui redditus habeant* quidem illi
magistri, *plus quadringentis millibus, tanto sumptu tamen
tamq. infano, oratorem nullum, Historici Polizici ne umbram
quidem, Semitheologastros Scholasticos aliquot, Philosophum
sesquialterum, qui non dicere sed dictare tantum sciat, habeant,*
quod ipsa Academia Cracoviensis illis publico libro ex-
probravit.

Sed non est quare nos, Nicanor, ea cura mordeat.
Deus qui inusitata felicitate Suecorum arma hæcenus for-
tunavit, Serenissimo Regi ejusque prudentissimo Sena-
tui consilia componendæ reipublicæ non denegabit.
Et vero quidni hodie præstent Suecones Gothique, quod
olim


olim æterna cum nominis laude Westrogothi Ostrogothique in Italia Hispania & alibi præstiterunt? Imo quod Gothi quondam effecerunt in ipsis illis Polonici hodie Regni provinciis. Ex Iornandesane discimus, Gothos simul trans Vistulam migraverunt, gentem Spalorum (quæ est ipsa nostra Polonorum trans Vistulam tunc habitans) victoricibus armis superasse, & denique Hermenerico Rege (quo tempore Gothi Russiam rubram, & Walachiam incoluerunt,) omnes populos inter mare Balticum, Euxinum pontum & Danubium suo imperio subiecisse. Nec tamen est quare hisce antiquis exemplis optima quæque nunc sperare te jubeam, cum alia sint ad manum recentissima. Ego potius quoniam tuis dubitationibus, nisi fallor abunde satisfeci, & jam modum pene excessi epistolæ, tandem desino. Deum autem veneror, ut pergat favere victoricibus inclyti populi armis, nobisque Germanis integram servet tranquillitatem. Vale. vi. Kal. Novembr.


CICERO LV.

F I N I S.

Arma ferenti

Omnia dat qui justa negat.





Biblioteka Jagiellońska



stdr0013334

Mc 4152 (1)-(6)

Art. Polon.
Miscell.

78.

